

Sumáriu Kazu
Tribunál Judisiál Primeira Instánsia Suai
Juñu 2025

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Judisiál Primeira Instánsia Suai

1. Totál kazu ne'ebé JSMP monitoriza : 9

Artigu	Tipu Kazu	Númeru
Artigu 145 Kódigu Penál (KP), no artigu 2, 3, 35 Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	1
Artigu 154 KP	Maus-tratus ba kónjuje	1
Artigu 177 KP no Artigu 182 KP	Krime abuzu seksuál ba menór ho agravasaun	2
Artigu 177 KP, artigu 182 KP no artigu 172 KP no artigu 173 KP no artigu 2,3, 35 Lei Kontra Violénsia Doméstika (LKVD)	Abuzu seksuál ba menór ho agravasaun no violasaun seksuál ho agravasaun ho natureza violénsia doméstika	1
Artigu 146 KP no artigu 2,3, 35 Lei Kontra Violénsia Doméstika (LKVD)	Ofensa ba integridade fízika grave ho natureza violénsia doméstika	1
Artigu 145 KP no Artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Ofensa ba integridade fízika simples no arma brankas	1
Artigu 139 KP	Omisídiu agravadu	1
Artigu 259 KP	Danu agravadu	1
Totál		9

2. Totál desizaun ne'ebé JSMP monitoriza: 3

Tipu pena	Artigu	Númeru
Suspensaun ba prizaun nia ezeusaun	Artigu 68 KP	2
Pena prizaun	Artigu 66 KP	1
Totál		3

1. Totál kazu sira ne'ebé kontinua prosesu tuir JSMP nia monitorizasaun: 6

B. Deskrisaun sumáriu ba desizaun kazu sira ne'ebé JSMP monitoriza

1. Krime ofensa ba integridade física simples no arma brankas

Nú. Prosesu : 0006/24.ANMBS
Kompozisaun Tribunál : Koletivu
Juis : Dra. Patricia Xavier Fatima de Araújo, Dr. Samuel da Costa Pacheco no Dr. Hugo da Cruz Pui
Prokuradór : Dr. Rafael Jeronimo Gusmão
Defeza : Dr. Jonas Henrique da Costa
Desizaun : Pena prizaun tinan 3 suspende ba tinan 4

Iha 06 Juñu 2025, Tribunál Judisiál Primeira Instância Suai, prezide leitura akordaun ba krime ofensa ba integridade física simples no arma brankas ne'ebé envolve arguidu Duarte Mendonça hasoru ofendidu Alfredo Lopes da Silva (nu'udar maun ho alin), iha Munisípiu Ainaro.

Akuzasaun Prokuradór

Prokuradór akuza katak iha 12 Feveireiru 2024, iha oras tuku 11:40 dadeer, arguidu ho nia feen kee hela fatuk iha sira nia to'os laran. Derepente ofendidu mosu mai hirus no tolok arguidu nia feen atu labele kee fatuk iha to'os laran, tanba rai refere sei iha hela disputa nia laran. Tanba la simu ho ofendidu nia aktu ne'e, arguidu lori katana taa dala ida iha ofendidu nia kelen parte loos rezulta kanek no suku pontu neen. La to'o iha ne'e de'it arguidu kontinua tuku dala ida iha ofendidu nia kotuk laran rezulta moras.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Lei Arma Brankas.

Produsaun ba prova sira

Iha prosesu julgamentu, arguidu konfesa faktu sira hotu iha akuzasaun no deklarata katak rai ne'e iha hela disputa no sira seidauk rezolve. Maibé bainhira arguidu ho nia feen kee hela fatuk ofendidu mosu mai hirus no tolok arguidu

nia feen, nune'e arguidu komete aktu ne'e hasoru ofendidu. Arguidu mós deklara katak arrepende ninia hahalok no rekoñese katak ninia hahalok ne'e ladi'ak no promete sei la komete tan krime hanesan iha futuru.

Alende ne'e, ofendidu kontinua konfirma faktu sira hotu iha akuzasaun no deklara katak to'o agora seidauk di'ak malu ho arguidu, tanba arguidu nunka buka ofendidu.

Alegasaun finál

Prokuradór haktuir katak, arguidu konfesa faktu hotu no konfirma mós hosi ofendidu, arguidu nia aktu ne'e provadu tuir faktu sira iha akuzasaun, tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Alende ne'e, defeza haktuir katak arguidu konfesa faktu sira, arrepende ninia hahalok no rekoñese katak hahalok ne'e ladi'ak no promete sei la komete tan krime hanesan iha futuru. Tanba ne'e husu ba tribunál atu kondena arguidu ho pena prizaun ho suspensaun ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak arguidu provadu taa dala ida iha ofendidu nia kelen no suku pontu neen no tuku dala ida iha ofendidu nia kotuk laran.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu foin mak mai hatan iha tribunál, arrepende ninia hahalok no promete sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan haat.

2. Ofensa ba integridade física grave no agravasaun

Nú. Prosesu	: 0147/24.BBMLV
Kompozisaun Tribunál	: Koletivu
Juis	: Dra. Patricia de Araujo F. B. M. Xavier, Dr. Nasson Mario Armino Marques Doutel Sarmiento no Dr. Samuel da Costa
Prokuradór	: Dr. Nelson J.S. Magno
Defeza	: Dr. Jonas Henrique da Costa
Desizaun	: Pena prizaun tinan 4 fulan 6

Iha 10 Juñu 2025, Tribunál Judisiál Primeira Instánsia Suai, prezide leitura akordaun ba krime omisídiu agravadu ne'ebé envolve arguidu Eligio Pereira Borges hasoru nia maun Silvester Pereira Borges, iha Munisípiu Bobonaro.

Akuzasaun Prokuradór

Prokuradór akuza katak iha 04 Agostu 2024, iha oras tuku 17:00 lokraik, arguidu hodi ai-lamtoro nia sanak bo'ot naton baku dala ida iha ofendidu nia ulun kauza kanek no raan sai barak rezulta ofendidu hakotu i'is iha fatin akontesementu. Antes ne'e, ofendidu foti arguidu nia osan ba joga karta,

maibé la fó hatene ba arguidu ho nune'e arguidu nervoju komete aktu ne'e hasoru ofendidu.

Prokuradór akuza arguidu kontra artigu 139 KP kona-ba omisídiu agravadu ho moldura penál tinan 12 to'o tinan 25.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak ofendidu monu tun ba rai no vijiñu sira lori kedas ba Ospital Referál Maliana. Tanba ofendidu nia kondisaun grave, nune'e kontinua evakua fali ba Dili, maibé iha dalan ofendidu hakotu i'is (mate) nune'e lori fila ofendidu ba uma. Arguidu deklarata mós katak iha akontesementu ne'e intensaan atu baku ofendidu hodi ameasa de'it ofendidu no la'os atu baku mate, maibé rezultadu oin seluk fali. Arguidu foin mai hatan iha tribunál, arrepende ninia hahalok no rekoñese katak hahalok ne'e ladi'ak.

Alegasaun finál

Prokuradór haktuir katak iha julgamentu arguidu konfesa faktu hotu, nune'e arguidu nia aktu ne'e priense elementu krime omisídiu agravadu tuir artigu 139 KP, tanba ne'e husu ba tribunál atu kondena arguidu tuir pena ne'ebé iha artigu 139 KP.

Defeza haktuir katak arguidu konfesa no arrepende ninia hahalok. Arguidu deklarata katak nia intensaan atu baku ameasa de'it ofendidu, maibé rezultadu oin seluk fali, tanba ne'e husu ba tribunál atu kondena arguidu ho pena ne'ebé adekuadu.

Desizaun

Hafoin halo avaliasaun ba faktu sira hotu, Tribunál halo alterasaun kualifikasaun jurídiku hosi artigu 139 KP kona-ba krime omisídiu agravadu ba fali artigu 146 kona-ba ofensa ba integridade fízika grave no artigu 147 KP kona-ba agravaasaun.

Tribunál konsidera katak mezmú iha akontesementu ne'e arguidu laiha intensaan atu baku mate ofendidu, maibé realidade aktu ne'e resulta ofendidu lakon vida. Bazeia ba alterasaun ne'e prokuradór no defeza laiha opozisaun.

Haktuir faktu provadu sira ne'ebé produs durante julgamentu no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan haat fulan neen.

3. Krime maus-tratus ba kónjuje

Nú. Prosesu	: 0094/23.PDSUA
Kompozisaun Tribunál	: Koletivu
Juis	: Dr. Hugo da Cruz Pui, Dr. Nasson Mario Armindo Marques Doutel Sarmiento no Dra. Patricia Xavier Fatima de Araújo
Prokuradór	: Dr. Simeão Brites Seixas
Defeza	: Dr. Albano Maia

Desizaun

: Pena prizaun tinan 2 suspende ba tinan 3

Iha 10 Juñu 2025, Tribunál Judisiál Primeira Instáncia Suai, prezide leitura akordaun ba krime maus-tratus ba kónjuje ne'ebé envolve arguidu NMN hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha loron ne'ebé la apura maizumenus iha Jullu 2023, iha oras tuku 20:00 kalan, arguidu ho ofendida diskute malu kona-ba ofendida tuda rahun tiha arguidu nia telefone, nune'e arguidu buti ofendida nia kakorok, tuku dala ida iha kabun no tebe dala ida iha kotuk laran.

Tuir fali iha 04 Outubru 2023, maizumenus iha oras tuku 8:00 dadeer, arguidu tebe dala rua iha ofendida nia kanuruk, silu ofendida nia liman parte loos no tebe dala barak iha ofendida nia kelen.

Prokurador akuza mós katak ne'e la'os foin mak primeiravés halo agresaun hasoru ofendida maibé dezde moris hamutuk hanesan feen la'en arguidu sempre baku hela de'it ofendida.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6.

Produsaun ba prova sira

Iha prosesu julgamentu, arguidu deklara katak iha faktu balun loos no faktu balun mak la loos. Faktu ne'ebé loos mak akontese iha Jullu 2023, arguidu buti ofendida nia kakorok no tebe dala ida iha ofendida nia kelen. Entretantu faktu ne'ebé laloos mak iha 04 Outubru 2023 no durante moris hamutuk arguidu sempre halo agresaun hasoru ofendida ne'e la loos. Arguidu mós deklara katak arrepende nia hahalok, foin mai hatan iha tribunál no promete sei la komete tan krime hasoru ofendida no ema seluk iha futuro.

Iha parte seluk, ofendida kontinua konfirma faktu sira iha akuzasaun no deklara katak durante moris hamutuk arguidu sempre halo agresaun hasoru ofendida, maibé ofendida la apresenta keixa tanba dook. Ofendida mós deklara katak di'ak malu ona ho arguidu no perdua ona arguidu.

Alegasaun finál

Prokuradór haktuir katak, mezmua iha produsaun ba prova arguidu deklara katak faktu iha akuzasaun ne'e balun loos no balun laloos, maibé ofendida kontinua konfirma faktu hotu iha akuzasaun. Ho nune'e prokuradór konsidera arguidu provadu komete krime hasoru ofendida, nune'e husu ba tribunál atu kondena arguidu ho pena ne'ebé mak hakerek ona artigu 154 KP.

Entretantu, defeza haktuir katak arguidu deklara de'it faktu ne'ebé arguidu komete hasoru ofendida. Alende ne'e arguidu ho ofendida di'ak malu ona, ofendida mós perdua ona arguidu, arrepende nia hahalok, foin mai hatan iha tribunál no promete sei la komete tan krime hasoru ofendida no ema seluk iha futuro. Tanba ne'e husu ba tribunál atu kondena arguidu ho pena ne'ebé kmaan.

Desizaun

Depoisde avalia faktu sira hotu, tribunál konsidera faktu sira alegadu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena prizaun tinan rua suspende ba tinan tolu.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>